

每週經課朗誦經文（巴克禮台語漢字）2014/12/28

共同經課-1 以賽亞書六十一章十～六十二章三節

10 我因為耶和華大大歡喜；我的心神因為我的上帝就快樂。因為伊用拯救做衫給我穿，用公義做袍給我moa，親像新子婿戴媛的帽，閣親像新娘妝飾寶物。11 因為土地怎樣互百項的五穀發芽，園怎樣互所種的發生，主耶和華也欲按呢互公義及謳佬發生佇萬國的面前。1 我因為錫安的緣故的確無靜靜，因為耶路撒冷的緣故的確無歇暈，直到伊的公義親像光啲發出，伊的拯救親像燈啲toh。2 列國欲看你的公義；列王欲看你的榮光。你欲得著稱呼新的名，就是耶和華親嘴所稱呼者。3 你欲佇耶和華的手中做媛的王帽，佇你的上帝的手掌做冕旒。

共同經課-2 詩篇一百四十八篇

1 恁著謳佬耶和華！對天頂謳佬耶和華，佇高的所在謳佬伊！2 伊的眾使者啊，恁著謳佬伊！伊的眾天軍啊，恁著謳佬伊！3 日及月啊，恁著謳佬伊！發光的星辰啊，恁攏著謳佬伊！4 天頂的天及天以上的水啊，恁攏著謳佬伊！5 諸個攏著謳佬耶和華的名！因為伊一下命令就攏受創造。6 伊將諸個建立，到永永遠遠；伊有定例，袂會廢無。7 對地上著謳佬耶和華，就是大魚及一切的深淵，8 火及冰雹，雪及雲霧，趁伊的話的狂風，9 大山及一切的小山，結果子的樹及一切的柏香樹，10 野獸及一切的精牲，蟲 及飛鳥，11 世上的君王及萬民，貴族及世上一切的審判官，12 少年人及在室女，老人及囡仔，13 諸個攏著謳佬耶和華的名！因為只有伊的名受尊做高；伊的榮光搬(pòan)過天地。14 伊興起伊的百姓的角，互伊聖的百姓攏謳佬伊，就是以色列人，親近主彼個百姓，恁著謳佬耶和華！

共同經課-3 加拉太書四章四～七節

4 若是到彼個時已經滿，上帝差伊的子，對婦仁人來出世，出世佇律法下，5 來贖回律法下的人，互咱受設立做子。6 為著恁是做子，上帝差伊的子的神入咱的心，喉叫講：「阿爸！父啊！」7 親像按呢，你毋是猶原做奴僕，就是做子；既然做子，就對上帝來做後嗣。

共同經課-4 路加福音二章二十二～四十節

22 照摩西的律例，in清氣的日已經滿，就抱嬰仔上耶路撒冷，欲獻互主。（23 照主的律例所記載講：「見若頭上的查甫子欲稱做聖歸佇主；」）24 也欲獻祭，照主的律例所講，用一對的鳩雛，抑是二隻鴿仔子。25 抵當佇耶路撒冷有一人，名叫西面；此人義閣敬虔，平時欣慕彼個安慰以色列的，聖神惦佇伊。26 伊曾得著聖神指示，知伊猶未死欲代先看見主的基督。27 伊互聖神感動，就入殿，抵仔耶穌的父母抱嬰仔入來，欲給伊照律法的例來行。28 彼時西面用手接嬰仔，謳佬上帝講：29 主啊！今照你的話，啲解放你的奴僕安然過世；30 因為我的目矚已經看見你的拯救 31 ——就是你所備辦佇萬百姓的面前的；32 做光來照外邦，閣做你以色列百姓的榮光。33 伊的父及伊的母啲奇怪所論嬰仔的話。34 西面給in祝福，閣對伊的老母馬利亞講：「此個嬰仔受設立，欲互以色列中多多人跋倒，多多人起來；也做受辯駁的記號，35 閣你家己的心也欲有劍鑿透過，互多多人心的念頭會露出。」36 閣有亞設的支派，法內力的查某子亞拿，伊是做先知，年歲已經老，對在室女的時，嫁互丈夫七年久，37 就守寡八十四年，攏無離開殿，禁食祈禱，暝日服事。38 抵抵彼時，伊進前稱謝上帝，對見若欣慕耶路撒冷得著贖回的人講起此個嬰仔的事。39 in照主的律法行逐項代誌明白，倒去加利利，到本城拿撒勒。40 嬰仔漸漸大，日日勇壯，智慧充滿，上帝的恩典及伊佇啲。